

lasse al bassà a casa soa. Sichè come el bassà ussirà del Signor, dove è andato col Signor a solazo, che si tien sarà sabato, li anderò a parlar. Mi è zonto uno altro intrigo de alcuni de la Morea quali hanno a fitto cose dil bassà et belibei suo fastidioso prototiero, qualj hanno portà de quì arz, che quelli dil Zante et di la Zefalonia li havea dannizati et fu fato tesis et bolato el suo, alcuni stati apicati et altri banditi con taia, et loro non sono stà refatti, i quali con uno navilio sachizorono il loco del Thimaeo del bassà, et tolse li formenti, et voleva far far el comandamento a Rodi fusse dà la galia Zena fu presa. È venuto quì el nostro consolo de Syo et mi ha ditto la cosa dil galion, processse che levò S. Marco et quel de la nave non volevo levar bandiera alcuna, el galion diserò artelarie vuode et la nave artelarie piene, sichè li fu forzo a far quel fece el capitano dil galion etc.

140 *Dil ditto, di 4, ricevute ut supra.* Zonse quì el fiol de Hironimo da Zara con un altro fiamengo per nome di Cesare, li quali è stati con el magnifico, Imbrain et il reverendo Gritti luni a dì 2 de questo *ad longum*, qual non ha portà lettera credential, *solum* una lettera, laudando la sapientia et virtù de questo Gran signor, che 'l vogli abrazar la pace con suo fradelo, laudando la pace, offerendosi con simel parole, et non ha altra comission de l'imperator. Et zerca Hongaria hessendo stà donata da questo Signor al re Zuane, però bisognava i trattasseno lo accordo con il reverendo Gritti orator de quel re et governador dil regno de Hongaria. Et li fo dito dal bassà quando ehe i haràno commission de Cesare li risponderano. Poi disse de tituli Spagna se deva in la lettera, re de Hierusalem et de Atene, duca de Patras, re de Hongaria, Dalmatia et Croatia, dicendo ve intitolate re et signor de nostri reami; et sopra questo molto el bassà se diffuse, et disse scrivè haver fato paxe con tutti li christiani, volevi intervenisse el re de Franza et il re de Ingiltera, et venitiiani che bisogno hanno loro de esser notati ne la paxe? Nui havemo Franza per fradelo, Anglia per amico, venitiiani che bisogno hanno de esser in la paxe? Non è quì l'orator suo, non hanno bisogno de' vostri mezi, io son bono a darveli, non avete voluto dar el concilio a lutherani, sicome eri obligati, io son bono a dargelo. Et disse molte altre parole. Et il reverendo Gritti, era dragoman ancora che vi fosse Janus bey, et il bassà comesse i tratasse con el reverendo Gritti per le cose de Hongaria. Et qual Gritti tornò a casa tardi, el Signor et il bassà fono reduti a le Vigne propinque al reverendo Gritti,

lo fanno chiamar et tratano queste materie, aziò el Signor intendi el tutto, sichè tien non sarà paxe. El bassà dovea andar a li casteli per fortificarli, ma per questi manizi se trata non anderà, nè de altro viazo che 'l vadi se parla.

Dil ditto, di 4 Zugno, ricevute ut supra. A di 3 riceveti tre man de lettere con li avisi et zerca Janus bey, qual è homo de extrema avaritia, volea l'utele dil dano de queli antivarani, li quali li veneno contra fino a Belgrado et se conveneno con lui. L'ho rizercato de redurlo al ben, l'ho veduto molto fredo, pur non se mancherà etc. Di le galie prese feci l'oficio come scrissi. Ho inteso el cativo officio fato per el bassà dil Cairo in relassar el consolo Bembo. Di Alexandria mandai uno altro comandamento pur non se mancherà iustificar al bassà del bon animo de quel' excellentissimo Dominio in verso questa excelsa Porta.

Dil ditto, di 10, ricevute ut supra. Havendo hauto le lettere de 8 mazo et 7 dil presente, fui con il magnifico Imbrain, et hessendo a la sua presentia trovai lo suo cor fredo; lo salutai iusta el consueto, et li partecipai le nove et la gran fede portava questo excellentissimo Stato a questa Maestà. Et li dissi el zonzer de Cesare a Barzelona, et di lo abocamento dil Papa col re de Franza a Niza, et el matrimonio de la nipote dil Papa con el duca de Orlens, et dil re Anglico che repudiava la regina prima per tuorne un'altra, etc. Disse el bassà sapeva dil bon animo de la Signoria, et era certo la daria aviso quel sarà de l'armata de Spagna, dicendo tegno la vorà calar adosso Caia et Diub dicendo: che credè vu vui? Laudai la soa opinion, il qual non crede la vengi a Coron. Penso el Papa no vol ben a Cesare et andando abocarse con Franza, potria meter pace tra Franza et Spagna, ma è stà tratà la sorela de Spagna da putana dal re d'Ingallera, come se potrà far ste cose? Con altre parole, *ut in litteris*, concludendo li dispiace questo abocamento. Et disse: la Signoria fece mal a dar danari a Spagna quando i feno la paxe. Li dissi, li fo si pochi, che l'imperator non li senti. Disse de le nostre galie recuperate, dicendo tuti me tien per vostro partial, mi bisogna haver di rispeti, non sarò per mancar di nostri capitoli, li ho fati venir quì el soracomito et li altri, et le galie siano condute quì. Dil galion ehe ruinò la nave soa nula me disse, et io li dissi pregandolo me dicesse ogni suo conceto, perchè tuto iustificherai, il qual acetò tuto aliegramente. Le cose di oratori cesarei et dil re di 140* Romani sono a le man dil reverendo Gritti, et di-